




Agricultor Willman Aristizabal

Ya caba cilantro y hasta lechuga fresco di Aruba ta obtenible den supermercadonan

ORANJESTAD(AAN): Aruba ta produci 25% di e consumo local di Cilantro. Un berdura cu ta wordo uza den sopi y stoba por ehempel, pero tambe pa traha juicenan natural.

Un cunucu local caminda produccion di Cilantro ta tuma luga ta na 'Cunucu Pachamama' di Willman Aristizabal situa na Soledad. Un cunucu cu Prome Minister Mike Eman a bishita den fin di siman ultimo.

Sr. Aristizabal, den un entrevista na su cunucu, a splica cu el a haci un esfuerso grandi pa yega asina leu, pero a demostra tambe cu na Aruba si por planta y produci "loke cu nos kier". Nan ta haci uzo di un 'Sistema Aeroponic' pa cultivo na e cunucu. Eynan mes tambe ta produci e tera, creando compost di sobranan di restaurant y supermercadonan cu ta wordo converti den tera. "Nos ta consumi masha poco awa (di WEB). Door di e sistema cu nos ta



uza, e awa no ta evaporar asina facil." Ademas nan tin tanki di 10 mil galon cu a recoge awa di yobida, cu lo wanta te cu luna di Mei / Juni pa sigui muha e matanan. E seccion unda cu e

ta sembra su productonan ta tapa cu un net fini, cu ta yuda reduci e efecto solar cu 50%. Esaki ta yuda tambe cu e awa no ta evaporar asina lihe.

Cilantro ta un producto (organico) cu ta wordo produci hopi lihe. Despues cu planta e simiya, den 4 siman e ta cla pa corta y spacha pa supermercadonan, despues di a keda un par di ora den cooler. "Den un supermercado ta facil pa detecta cua Cilantro ta produci localmente y cua a wordo importa. Esun local ta holo y ta mantene su holo, mientras cu esun di afu no tin holo mas."

E ta haya cu Aruba por yega ta autosuficiente den varios producto di alimento. "Den realidad, tur loke cu nos kier," el a enfatisa.

Ademas di Cilantro, nan ta entrega 5 mil lechuga mensual na supermercadonan rond di Aruba. "Nos ta apoya hopi e studiantenan di SPO, ya cu nan ta e generacion nobo. Si nos logra lanta nan interes, cu nan ta enamora di e trabou aki, nan lo ta e generacion nobo cu ta bay planta."